

Die Römische kirch vier schwestern hat
So man hielt patriarchen stadt
Constantinopel / Alexandria
Jerusalem / Anthiochia
Sie findt yetz kumen gantz dar von
Es würt bald an das houbt ouch gon!
Das ist als vnser sünden schuldt
Keyns mit dem andern hatt gedult
Oder mittlyden syner schwär
Jeder wolt / das es grösser wär!
Vnd gschicht vns / als den ochsen gschah
So eyner dem andern zü sach
Bis das der wolff sie all zerreyß
Erst ging dem letsten vß der schweiß!
Jeder der griff yetz mit der hant
Ob noch kaltt sy syn mur / vnd want
Vnd gdenckt nit / das er vor lesch vß
Das für / ee es jm kum zü huf
So kumbt jm dann ruw / vnd leytt /
Zwytracht / vnd vngheorsamkeit
Den krysten gloub zerstören düt
On nott vergüßt man krysten blüt
Nyeman gdenckt / wie nach es jm sy!
Vnd wânt doch allweg blyben fry
Bis jm vnglück kumbt für syn thür
So stoßt er dann den kopff har für!
Die porten Europe offen syndt
Zü allen sitten ist der vyndt
Der nit schlossen noch rüwen düt
In dürst allein / noch Christen blüt

gu
ort
hülfe
21

